



Publicaziuns dalla vischnaunca, jamna 40

Cussegl da vischnaunca

Il cussegl da vischnaunca seraduna *venderdis, ils 4 d'october 2013 allas 19.00* en sala Peter Kaiser en claustra. Dalls 19.00–20.00 informaziun entras frater Niklaus davart las festivitads da 1400 onns claustra Mustér.

Tractandas:

1. Protocol nr. 5-2013/2016
2. Credit per la sanaziun dil parcadi Claustra (messadi nr. 5-2013/2016)
3. Regulativ da fatschentas: Cuntinuaziun (messadi nr. 2-2013/2016)
4. Ura da damondas (conform ad art. 44 dil regulativ da fatschentas)

Il president dil cussegl da vischnaunca

Taxa da cumpensaziun da pumpiers 2013

Tenor art. 12 dalla lescha da pumpiers dalla vischnaunca da Mustér ein students ed emprendists deliberai dil survetsch activ da pumpiers sco era dalla taxa da cumpensaziun. Nus fagein attents tut ils students ed emprendists sur 20 onns d'inoltrar a scret ina confirmaziun actuala dalla scola ni digl emprendissadi. Il mussament ei da tarmetter entochen **venderdis, ils 11 d'october 2013** all'admini straziun communal, caum postal 57, 7180 Disentis/Mustér ni per e-mail (jbearth@disentis.ch). Mo cun ina confirmaziun a scret sa la deliberaziun vegnir risguardada.

Gia ordavon grond engraziament per las breigias.

Administraziun communal Disentis/Mustér

Plan da quartier Via Veglia Introducziun dalla procedura

Tenor conclus dils 30 da settember 2013 comunichescha la suprastonza communal l'intenziun d'elaborar il plan da quartier Via Veglia. Leutier ei previu ina procedura davart il plan da quartier ed il regruppament da terren el senn dallas prescripziuns dils art. 51 e 65 dalla lescha davart la planisaziun dil territori pil cantun Grischun (LPT) e digl art. 16 dall'ordinaziun davart la planisaziun dil territori pil cantun Grischun (OPT).

Il plan da situaziun cugl intschess pertuccaus dalla procedura ei publicaus naven dils 4 d'october entochen ils 4 da november 2013 en casa communal (stanza nr. 10) duront las uras da spurtegl.

La procedura pil plan da quartier intenda da reglar la formaziun, l'avertura e la surbaghegiada sco era il regruppament da terren el rom dallas prescripziuns da baghegiar.

Encunter l'intenziun davart l'introducziun dalla procedura per il plan da quartier ed igl intschess pertuccau sa duront la publicaziun uffiziala vegnir inoltrau protesta alla suprastonza communal, caum postal 57, 7180 Disentis/Mustér. La protesta sto vegnir inoltrada a scret ed ei da motivar.

Disentis/Mustér, ils 1-10-2013 *Suprastonza communal*



Radunonza dil vischinadi Segnas/Mompé Tujetsch

Mardis, ils 8 d'october 2013 allas 20.15 ell'ustria «Cresta», Segnas.

Tractandas:

1. Beinvegni
2. Elecziun d'in dumbravuschs
3. Prelecziun ed approbaziun dil protocol
4. Orientaziun president
5. Rendaquen e rapport dils revisurs
6. Nominaziun delegau Mompé Tujetsch
7. Nominaziun per la cumissiun da gestiun
8. Program da lavur
9. Fixar tscheins per diever zona
10. Varia

Suenter radunonza dil vischinadi ha liug la radunonza dil fuorn Segnas.

Clom d'urgenza 118

Preziadas vischinas, preziai vischins

Onn per onn dat ei cass en nies cantun nua ch'ils pumpiers vegnan clamai memia tard sil plaz da seracass. Savens emprovan habitontas e habitonts da cuntonscher pumpiers ch'els enconuschan via telefon privat. Il temps che va aschia a piarder ha ils davos dus onns caschunau la veta a duas persunas el Grischun! Plinavon daventan ils donns cun mintga minuta spiarsa pli gronds. Perquei s'adressein nus a Vus cun ina ferventa supplica: *clamei ils pumpiers mo sur il clom d'urgenza 118*. Era sche Vus veis mo in pign problem sa il polizist che pren encunter Vies telefon reagir aschia che mo ina pintga gruppa d'agid ni singulas persunas vegnan clamadas. Ulteriuras informaziuns era davart la prevenziun anfleis Vus sin nossa pagina d'internet: www.pumpiers-sursassiala.ch.

Engraziel per Vies sustegn!
Vos pumpiers Sursassiala

Sentupada dallas Lumnezianas e dils Lumnezians che vivan a Mustér

Eis Ti burgheis/a e carschius/ida si ella Val Lumnezia?

Lu envidein nus Tei cordialmein a nossa sentupada. Uonn visitein nus, en buna cumpignia, nies origin, la biala Val Lumnezia.

Bugen spitgein Ti'annunzia entochen ils 5 d'october: Regina Giger-Caminada, telefonin 079 228 53 23, ni mail: contact@rgc-art.ch.

Staziun d'anugls Disentis/Mustér

Punctaziun d'anugls sonda, ils 12 d'october 2013 allas 10.00 a Trun.

*Per la suprastonza:
Tini Flepp*



Uniun samaritana Mustér

Nies proxim exercezi meinsil ha liug *gliendisdis*, ils 14 d'october 2013 tier la firma Giger pegnas scalegl a Sedrun (trer en resti cauld!).

Rimnada allas 19.15 sin plaz-scola, Mustér.

Sin ina stedia participaziun selegra
la presidenta

Biblioteca populara Disentis/Mustér e contuorn

Exposiziun:

Ils clubs da curling Mustér e Sedrun dils 23 da settember tochen ils 18 d'october 2013

Il proxim unviern arriva segir! El rom da nossa seria: *La biblioteca presenta uniuns localas* ein naven d'immediat ils clubs da curling Mustér e Sedrun tier nus sin viseta. Il sport da curling vegn era numnaus schah sil glatsch. Quei pervia da sias numerusas raffinessas tactics. El auda tiel sport da precisiun. Ella biblioteca confruntan aschia per quater jamnas crappa da curling cun cudischs da leger. Ina interessanta scuntrada.

Nus selegrein sin Vossa viseta!

Ils clubs da curling Mustér e Sedrun e la Biblioteca populara Disentis/Mustér e contuorn